

Ku socota  
Waalidka/waaliddiinta ardayda dhigata fasalka 6  
ee dugsiga hoose-dhexe iyo dugsiga dadka Saamaha ah  
ama fasalka 7 ee dugsiga gaarka ah

## Imtixaan qaran

Waa la idin salaamay!

Waxaad warqaddan u heleysaa iyadoo ay sababtu tahay in aad waalid iyo/ama waaliddiin u tihiin arday sanad dugsiiyeedkan imtixaan qaran ku sameyn doona maddooyinka xisaabta, swiidhishka iyo swiidhishka loo barto luqad labaad ahaan.

### Maxay ardaydu u sameynayaan imtixaan qaran?

Ardayda dhigata fasalka 6 ee dugsiga hoose-dhexe iyo dugsiga dadka saamaha iyo fasalka 7 ee dugsiga gaarka ah waxay sameynayaan imtixaan qaran. Imtixaanku wuxuu gacan ka geysanayaa in si isu dhiganta oo caddaalad ah loo qiimeeyo ardayda aqoontooda. Imtixaanku wuxuu macallimiinta gacan ka siinayaa in ay ardayda aqoontooda qiimeeyaan, shahaaddana u saaraan si waafaqsan shuruudaha aqoon ahaan leyska rabo ee ku aaddan shahaaddo saaridda ee manhajka waxbarashada ku yaalla.

Imtixaanka waxaa lagu hormariyaa, laguna diyaariyaa dhowr ka mid ah jaamacadaha waddanka oo ay Hey'adda dugsiyadu u xil saartay. Macluumaadka imtixaanka ku jira waxaa lagu tijaabiyay dugsiiyo fara badan oo kala duduwan oo waddanka oo dhan ku faafsan. Arday iyo macallimiin ayaa ka dhiibtay aragtiyo la tixgeliyay markii imtixaanka la soo saarayay.

Waa manhajka waxbarashada ee maaddooyinka kala duduwan halka laga duulayo marka waxa uu imtixaanku ka koobnaanayo iyo qaabkiisa la go'aaminayo. Laakiin wax walba oo manhaj waxbarasho ku jira hal imtixaan laguma tijaabin karo. Imtixaan nuucaas wuxuu noqon karaa mid si xad ka bax ah u ballaaran.

Imtixaannada qaran kama duulayaan qaab shaqo oo go'an ama qalab waxbarasho oo gooni ah. Imtixaanka wuxuu ardaygu siyaabo kala duduwan ugu muujinayaa aqoontiisa.

### Goormee imtixaannada la qaadayaa?

Imtixaannada qaran waxay ka koobanyihiin imtixaan-qeybeedyo kala duduwan. Imtixaannada afka ah waxaa la sameyn doonaa inta lagu jiro xilli dugsiiyeedka deyrta, usbuucyada 45-50. Dugsiga ayaa go'aaminaya waqtiga ay ardaydu imtixaannadaas sameynayaan. Imtixaan qeybeedka qoraalka ah waxaa la sameyn doonaa taariikh go'an oo xilli dugsiiyeedka guga ka mid ah oo ay Hey'adda dugsiyadu go'aamisay. Imtixaanku waa mid khasab ah.

### Sidee loo qiimeynayaa imtixaannada?

Waxaa jira tilmaamooyin faahfaahsan oo qiimeynta imtixaannadaas qaran loogu tala galay oo uu macallinku raacayo. Marka uu dabadeed macallinku sameeyo qiimeyn guud oo ku

aaddan aqoonta ardayga ee maaddada shahaaddo saaridda wuxuu xitaa macallinku tixgelin ku siinayaa natijada imtixaanka.

## **Natiijo ururin**

Hey'adda dugsiyadu waxay si iskaashi la leh Hey'adda dhexe ee tira koobka ururineysaa natijoooyinka imtixaannadaas qaran. Ururinta natijoooyinka imtixaanka waa loo baahanyahay si qiimeyn dugsiyada loogu sameeyo laakiin xitaa si loo lafa guro natijoooyinka waddanka ee degmooyinka gudohooda iyo milkiilayaasha dugsiyada xurta ah.

## **Xisaab**

Imtixaanka qaran ee xisaabtu wuxuu ka koobanyahay qeybo kala duduwan oo imtixaan-qeybeedyo ah oo leh hawlo shaqo oo qoraal ah oo ardaydu si shakhsi-shakhsi ah u xallinayaan iyo hawlo shaqo oo afka ah oo ay ardaydu kooxo yar-yar ahaan ku xallinayaan. Hawlaha shaqo ee qoraalka ah iyo kuwa afka ah labadaba waxaa ardayda fursad loo siinayaa in ay muujiyaan in ay sharraxi karaan, ayna ka doodi karaan sidii ay xisaab ahaan u fikireen.

## **Swiidhishka iyo swiidhishka luqad labaad ahaanta ah**

Imtixaanka qaranka ee maaddooyinka swiidhishka ah wey mideysanyihiin, waxay ka koobanyihiin tiro imtixaan qeybeedyo ah. Waxaa jira hawlo shaqo oo ay ardaydu u xallinayaan si shakhsi-shakhsi ah iyo koox-koox ah intaba. Iyadoo hawlahaas shaqo la adeegsanayo ayey ardaydu fursad u helayaan in ay muujiyaan aqoontooda ku aaddan hadalka, wada hadalka, akhriska iyo qoraalka.

## **Ingiriis**

Imtixaanka qaranka ee ingiriisku wuxuu ka koobanyahay dhawr imtixaan qeybeed. Iyadoo la marayo shaqo hawleedyada imtixaanka wuxuu ardaygu fursad u helayaa in uu muujiyo awooddiisa ku aaddan isticmaalidda ingiriiska ee hadal iyo qoraal ahaanba ah iyo awooddiisa ku aaddan in uu fahmo ingiriiska uu maqlayo iyo kan uu akhrinayo.

## **Xaggee macluumaad dheeraad ah laga helaa?**

Macluumaad dheeraad ah oo ku aaddan imtixaannada qaranka ee maddooyinka waxaa laga helaa barta intarneetka ee Hey'adda dugsiyada

[www.skolverket.se/bedomning](http://www.skolverket.se/bedomning)

Halkaas waxaa sidoo kale laga helaa isku xiryaal tusaale ahaan ku aaddan hawlo shaqo oo imtixaannada ka mid ah.

## **Hey'adda dugsiyada kala xiriir**

[nationellaprov@skolverket.se](mailto:nationellaprov@skolverket.se)